



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir\_yimym



tir yimym

TAPAK 3

G20 South Africa nung US  
shilem magitsü: Trump

PM Modi-i November 11-12 anogotem  
nung Bhutan semdangtsü

VOL. XXIII ISSUE NO. 34 (ADOK 34) DIMAPUR TENTONÜ (NONDAY) YIMPOKSÜI (NOVEMBER) 10, 2025

₹ 5.00

## Nagaland nung Remembrance Day amungtsü

**Dimapur, November 9, 2025 (TYO):** Nagaland-i alima den külemi November 11, 2025 nü Remembrance Day amungtsü.

World Wars aser rara balala nung British aser Commonwealth servicemen & women-i bendanga agütsüba tushi aser bilemteta iba anogo amungtsü.

Iba anogomung ya Nagaland sorkari Commonwealth War Graves Commission (CWGC) den külemi amungtsü.

Remembrance Day ajanga raratem, mangatettep adokba tensa aser peacekeeping operations mapang tasürtem nem tetushi agütsür. Iba anogo nung nüjiso aser yimjung kümzüka ayudang taküm bendanga agütsürtemi meyipa reprangshir.

Yaküm Nagaland nung Remembrance Day mezüng amung aser iba nung United Kingdom-i yaritep. Iba sentong nung British Deputy High Commissioner-i shilem agia liasü.

Iba anogomung ajanga Nagaland aser United Kingdom nung alirtem tsüngda tesentaktep akangshir. Yaküm takok ngua amungba sülen State Government indang official calendar nung tongtipang shilem ka kümogo.

World War II nung kanga

dang tongtipang rara Battle of Kohima bilemteta aser alima putiotsü nung Kohima tenüng dendakja iba anogo metsüngareta amunger.

November 11, 2025 anepdang Kohima War Cemetery nung sentong ka agütsü aser idangji Chief Minister Dr. Neiphiu Rio-i tetushi süa jaoker aser Deputy Head of Mission, British Deputy High Commission, Kolkata Bhaarat Dave-i alakteta jaoker ama shilem agütsü.

Iba sentong nung United Kingdom aser Ireland Embassy tem nungi teshimtet nübotem, MLA tem, sorkar ketdangsurtem, Army & Police, war veterans aser tangartem adentsü.

Sentong nungsa Battle of Kohima indang kaketterem, flower stalls, aser musical performances alitsü. Maneni Flatbenders Club ajanga Vintage Cars Rally ketdangsä agütsü.

Nikongdang 5:00 ako nungi Banquet Hall, Hotel Vivor, Kohima nung "The Battle of Kohima: Yesterday, Today & Tomorrow" ta ser olemtepba sentong ka alitsü.

Iba sentong nung Advisor to the Chief Minister Abu Metha aser Politician, Poet, & Author Mmhonlumo Kikon nati shilem agütsü.

## RSS-i kija mesüra party pusema menungiter: Mohan Bhagwat


**New Delhi, November 9, 2025 (Agencies):** Political party ka dak alaka tanüngba party temi Rashtriya Swayamsevak Sangh (RSS) züngsemtem politics nung manioker ta RSS tanishisang Mohan Bhagwat-i ashi.

"BJP-i dang Sangh züngemtem anioker. "RSS-i political party kecha pusema menungiter aser züngsemtem dang party ka nung adentsü tetuyuba kecha magütsür" ta pai ashi.

Bengaluru nung '100 Years of Sangh Journey: New Horizons' ta ser sentong ka nung jembidang Bhagwat-i iba ya ashi.

"Onoki party ka dang saklokba mali. Sangh party kecha mali. Party kecha onok meyong masü aser party ajak onok meyong kechiyong parnok ajak Indian parties lir. Ajisüaka, BJP dak alaka tanüngba party temi RSS züngsemtem manioker" ta pai metetdaksü.

"Party kati na RSS wallah oadokang ta ashir. Tanga party kati Sangh den tesentaktep mepila tashi onoki shinga manioktsü bangzünga lir ta ashir. Anungji Swayamsevak ka atema kishi ajak shibanga lir. Iba jagi kishi



Mohan Bhagwat

lapoka aliba party BJP nung jenoker" ta paisa shisem.

Nisung aikati RSS ya BJP indang ideological parent body lir ta bilemer saka telok anaprongi ibaji magizüker.

"RSS-i party mesüra kecha masü saka policy tem pusema nungiter. Onoki policy shitak nungita yaritsü saka party mesüra kijatembo menungittsü" ta Bhagwat-isa ashi.

Ayodhya nung Ram Mandir yanglutsü atema inyakba nung Sangh volunteers-i pusema nungit aser RSS-ia yanglutsü ta noktak. Anungji iba nung BJP-i pusema nungit. Congress mesüra tanga party kari danga pusema nungit asübo onoki parnok pusema nungitla" ta paisa ashi.

## Shree Marwari Sammelan-i Speaker Om Birla pelaa agizük



Kohima nung Lok Sabha Speaker Om Birla-i Helipad nung pa pelashishia agizükba sentong nung jembiba angur.

**Dimapur, November 9, 2025 (TYO):** Shree Marwari Sammelan-i November 9, 2025 nü Lions Club, Dimapur nung Lok Sabha speaker, Om Birla pelaa agizükba sentong ka ayonga agiogo.

In his address Om Birla said, Nagaland is one of courage, bravery and valour, a land of bold and fearless people.

"Nagaland ya tasütait aser temulung tulu alirtem state ka lir. Dimapur nung linük tesem balala nungi nisungtem adenshia alir aser tayongzükbä o timtem balala ajangshia arur. Ajisüaka temulungtetba, merangba aser pei dak tamang akaba ajanga kechi nung lidir liaka nisungtemi iba state indang sobaliba senmang agizüker" ta Om Birla-i ashi.

"Marwari nungeri India mesüra bendangleni oaka pei tangatetba aser sobaliba mamadoker. Marwari nunger aolen ajak nung sobaliba tejangja ajanga maitsü sayur aser iba tesem nung lisopur sobaliba, inyaksangshi aser mapa inyakba den anidaker" ta pai ashi.

Marwari nungeri lokti tenzükbä, bendanga agütsüba aser tenangzükbä tulu yur inyaksangshir. Lendong-tsüdong, tensa tamajung mesüra tayongzükbä ajurudang Marwari nungeri teti yaritsü mera mezüng agir ta paisa ashi.

"Marwari nungeri India mesüra bendangleni oaka pei tangatetba aser sobaliba mamadoker. Marwari nunger aolen ajak nung sobaliba tejangja ajanga maitsü sayur aser iba tesem nung lisopur sobaliba, inyaksangshi aser mapa inyakba den anidaker" ta pai ashi.

Marwari nungeri lokti tenzükbä, bendanga agütsüba aser tenangzükbä tulu yur inyaksangshir. Lendong-tsüdong, tensa tamajung mesüra tayongzükbä ajurudang Marwari nungeri teti yaritsü mera mezüng agir ta paisa ashi.

## BJP-i tamakok miimbangtsü atema Vande Mataram benjung amunger

**Agartala, November 9, 2025 (Agencies):** Nübottemi BJP anema lungkak aitba miimbangtsü atema parnoki Vande Mataram küm 150 ajungba benjungmung tenzükogo ta Tripura Pradesh Congress Committee President Asish Kumar Saha-i ashi.

"BJP-i Hindu Mahasabha aser RSS tsüngsü nung anidaker. Linük nüjiso atema rara nung RSS pur maden. Parnoki nüjiso bushiba nung kodanga shilem magi saka meyiper British nunger ang yari" ta Saha-i ashi.

"Jawaharlal Nehru aser Mahatma Gandhi amala lennirtem mezüngmeshiba ajanga parnoki freedom movement tanüla

"Nenok aika küm noklang ka, küm tenem tejakdang arurtem aser karbo yangi asortem lir. Saka nenok oboula nungeri parnok tasodang nungi mapa inyakdang timtema aruba ajanga asenok ajak ajungmesor. Tayongzükbä tulu ka süaka meranga inyakba aser tamang akaba ajanga takok angur ta parnoki asenok dang sayur" ta Om Birla-isa metetdaksü.

"Tesüiba küm 10 tsüngda Northeastern state tem nung terenlok ngua aruogo aser ano teinyaktsü aika lir. Ajaklen maongkatem lir anungji asenok ajaki developed India tongdaksütsü atema Nagaland nung sobaliba aser mapa inyakba den putepa inyaktsüla. Iba tangatetba ya Atmanirbhar Bharat (self-reliant India) nung tera yanga lir" ta paisa ashi.

Nagaland nung alirtem dak tasen purapitetsü sempet lir aser tasütait, ta Birla-isa shisem.

Nagaland nung aliba nübottem aser yangi mapa inyakertemia India renloka aoba nung shilem agir ta ni amanger. Nenoki dokan lapoka, shishilembabaren tenzüka, industries mesüra service sector nung inyakba ajanga linük renlokba nung shilem agir ta paisa metetdaksü.

"Tarutsü anogotem Nagaland tobur ajung ajanga domestic aser international tourists aika atsür arutsü. Anungji asenoki

industries, investors, aser agricultural entrepreneurs atsür arutsüba nung temulung agütsütsüla aser tourism ajungkettsüla" ta Lok Sabha speaker Birla-isa ayongzüük.

"Marwari nungeri pelashishia agizükba atema kanga pelar aser tarutsü nunga Nagaland maneni semdangnür" ta paisa ashi.

Honibarnü Dimapur Airport nung Minister Jacob Zhimomi aser Minister Metsubo Jamir nati Om Birla pelaa agizük. Airport nungsa 15th NAP (IR) ajanga pa nem Guard of Honour agütsü.

Om Birla-i November 10, 2025 nü Kohima nung Commonwealth Parliamentary Association (CPA) India Region Zone-III indang 22 buba Annual Conference tenzüksütsü.

November 10 aser 11, 2025 anogo ananü mungdang nung CPA India Region nung Zone III nungi Presiding Officers, MPs aser MLAs adentsü. Iba Zone nung Northeastern region nungi state 8 dena lir.

Iba mungdang atema omenji "Policy, Progress & People: Legislatures as Catalysts of Change" lir. Maneni, sub-themes ji "Role of Legislatures in Achieving Viksit Bharat" aser "Climate Change - In the Light of Recent Cloudbursts and Landslides in Parts of the Northeast Region" lir.

ajungbena parnoki Vande Mataram küm 150 ajungba benjungteper" ta Saha-isa metetdaksü.

"Vande Mataram nem akhüm tetushi agütsütsüba ya tanü tasen masü, nisung ajaki akhümtsübur, saka parnoki iba ya telemsa adoktsüba hadir ka ama benshir. Ozü lennirtem aser züngsemtemi yimdong nung sorkar anema lungkak aiter, election nung tim masüba atema ola adoker aser temetentem kümzüka ayutsü atema akhanger. Ajisüaka BJP-i item lungkakba paitoktsü atema Vande Mataram küm 150 ajungba benjung amunger. Onoki iba inyakyim khukhua aitsür" ta paisa ashi.

## St. Joseph's College, Jakhama nung awareness sentong ayongzük



St. Joseph's College, Jakhama indang Indoor Stadium nung November 7, 2025 nü Consumer Rights indang awareness sentong ka agidang tangokba noksa nung Joint Secretary, Department of Legal Metrology & Consumer Protection, Bendaanglila, NCS aser ketdangsürtem angur.

**Dimapur, Yimpoksüi/Nov. 09 (TYO):** Department of Commerce, St. Joseph's College (A) Jakhama ajanga Department of Legal Metrology & Consumer Protection, Nagaland den lungjemer November 7, 2025 nü Indoor Stadium, St. Joseph's College, Jakhama nung awareness sentong ka "Legal Metrology & Consumer Protection: The Journey Towards Viksit Bharat 2047" omen nung ajemdaker ayongzuka liasü.

Kaketshir nem consumer rights, legal metrology aser India tejakleni aotsü atema consumerism angatetdaksütsü nükjidong nung iba sentong ya ayongzük.

Sentong akhumdong Joint Secretary to the Government of Nagaland, Department of Legal Metrology & Consumer Protection (LMCP), Bendaanglila, NCS ajanga jembidang, Legal Metrology yagi shishilempadak aonsotsü seret aoba nungi tenzüka petrol pumps nung totzü aliba tashi tongtipang shilem agir saka asenoki memeteter, ta ashi.

'Weights and measures' shidak amshidaksüba aser tim masüba yimya amshiba nungi

talir aser tayokertem kumzüka ayuba nung Legal Metrology Enforcement System yagi ola madoki mapa inyaker, ta lai ashi.

Osettsüset tuozük nung aiben ashioksüba indang rateta jembidang, packaged goods aser totzü meshidak agütsüba ya tim masüba kisüng masü saka ozüng agi memelaba lir, ta ashi.

Lai kaketshirtem saksalema tuozük, MRPs aser expiry dates tem reprangtsü aser aibelenba lira tim ketdangsür nem osang agütsütsü ayongzuka liasü. Laisa parnok dang pei aliba tesem nung awareness prokshitsü ayongzuka liasü.

Loktiliba nung ochishia aliba aser inyakra nung lenir ka-ka akumtsü ayongzuka liasü.

Ola madoki süaka tongtipang system ajanga consumers nem pei temeden jenjang shidak agütsür, ta lai ashi aser iba mission nung ajaki yariteptsü ayongzuka liasü.

Joint Controller, Department of LMCP, Government of Nagaland, Limatoshi Jamir-i iba sentong ayongzükba nükjidong rateta jembidang, Viksit Bharat 2047 koba dang 'Developed India' ta ajar, ibai 2047 tashinung India ya 'developed nation' ka kumdaksür alitsü sorkar

nükjidong lir, ta ashi.

Limatoshi Jamir-i consumers ajunga dang India renlokdaaksütsü asoshi teka amteper inyaksü ayongzük aser consumer rights amshitsü asoshi awareness agütsüba nung shilem agitsü ajungshia liasü.

Shisalen sayur Addl. Public Prosecutor, Nagaland Lakayukta, Abraham-i Consumers' Protection Act 2019 nungi 'right to safety, right to be informed, right to choose, right to be heard, right to seek redressal and right to consumer education' amala tongtipang onüktem lemsatepa liasü.

Sentong nung Kepozo Kapuh, Former College Ambassador menden liasü, Dr. Sr. Thresiamma V.G, Vice-Principal (Academic Affairs) ajaga sarasadem aser Moatamsu (Head, Department of Commerce) ajanga salem o jembia liasü.

Maneni Sangnyu Yenla-i temeja ken ka aten aser Mughahito Tuccu, General Secretary (Department of Commerce) ajanga melepzüng o jembiba sülen Rev. Fr. Vipral John, PG Coordinator ajanga sarasadema sentong tembang.

## Assam Rifles-i Shamator nung Unity March ayongzük

**Dimapur, Yimpoksüi/Nov. 09 (TYO):** Linük lungjemdaksütsü tanüla aser tangatetba nung Assam Rifles, Shamator Battalion ajanga state sorkar den lungjemer Sardar Vallabhbhai Patel (Iron Man of India) sor küm 150 ajungba bilemteta "Unity March / Padyatra" ayongzuka liasü.

"Ek Bharat, Shreshtha Bharat" osang prokshia nüburtem tsüngta tangatetep, telungjem aser arok tashi ajungkettsü nükjidong nung iba sentong ayongzuka liasü.

Lokti tentet balala nungi adenshia Sardar Patel mangdang aser inyakyim benjonga iba jajaba nung shilem agia liasü.

Patel-i linük lungjemdaksüba nung tongti shilem agia liasü.

Iba sentong nung Naga nunger sobaliba balala sayuba den külemi Assam Rifles Pipe Band ajanga shilem agia Rashtriya Gaan tena liasü.

Tongti tesemdangeri linük lungjemdaksüba, yimjung aser terenlok asoshi Assam Rifles-i shilem tulu agiba aser Sardar Vallabhbhai Patel mapa tajung lemsatepa liasü.

Region nung armed forces aser nüburtem tsüngta tesendaktep, terenlok, tesunep aser telungjem adokdaksütsü asoshi Assam Rifles temulungtetba nung lir, ta sangdong ka ajanga ashi.

## AR-i Pungro nung sensaksem sentong ka ayongzuka agi



**Dimapur, Yimpoksüi/November 9 (TYO):** India indang National Song "Vande Mataram" mejemer küm 150 ajungba nüngdem nung Assam Rifles-i iba ken ya puti otsü nung koda tongtibang aser linük asoshi koda tongtibang iba indang tangazükba agütsütsü atema Saramati School, Pungro, nung November 8 nü sensaksem sentong ka ayongzuka agiogo.

Vande Mataram-a ken mejemba, tetezü aser putusa putu koda tongtibangsa tena arur iba indang metetdakja lanurtem ajungmesotsü nükjidong nung iba sentong ayongzuka agiogo. India nüjiso atema raraba mapang iba ken yagi nisung million aika longjemdaksü aser tanü tashia iba ya patriotism aser linük meraket temaitsü lir.

Sentong nung kaketshirtemi

Bankim Chandra Chattopadhyay-i iba ken mejemba, India nüjiso atema raraba mapang iba ajanga nüburtem ajungmesoba aser India indang National ken ama agizükba indang angazuka liasü. Sensaksemba mapang telongjem, bendanga agütsüba aser linük atema bendanga agüja inyaksü atema kaketshirtem ajungmesoa liasü. Kasa mapang nung kaketshirtemi national symbols aser lisopurtem yongtsü nung telongjem adokdaksütsü atema parnok shilem indang tebilemba lemsatepa liasü. Iba sentong ajanga India takar sobaliba, puti otsü indang tali tajungba angatetdakja lanurtem ajungmesogo.

Iba amala sentongtem ajanga Assam Rifles-i maneni linük telongjem ajungketa arudar.



  
 British Embassy

**Nagaland Commemorates**  
**Remembrance Day**

TUESDAY, 11<sup>TH</sup> NOVEMBER 2025  
 11:00 a.m. at Kohima War Cemetery  
 Commonwealth War Graves Commission

**for the FALLEN**  
 ROBERT LAURENCE BINYON  
*"They shall grow not old, as we that are left grow old:  
 Age shall not weary them, nor the years condemn,  
 At the going down of the sun and in the morning  
 We will remember them".*  
**"LEST WE FORGET"**

**SPECIAL GUEST: Dr. NEIPHIU RIO**  
 Hon'ble Chief Minister, Nagaland

**HONOURED GUEST: Mr. BHAARAT DAVE**  
 Deputy Head of Mission, British Deputy High Commission, Kolkata

**CHAIRPERSON: Mr. ABHIJIT SINHA, IAS**  
 Home Commissioner & Principal Secretary, Government of Nagaland

**Sequence of**  
**PROGRAMME**

|                                                                                                                                                                 |                                                                                                                                         |
|-----------------------------------------------------------------------------------------------------------------------------------------------------------------|-----------------------------------------------------------------------------------------------------------------------------------------|
| 10:45 hrs                                                                                                                                                       | : Laying of wreaths by Dignitaries & Guests                                                                                             |
| 10:50 hrs                                                                                                                                                       | : Guests to be seated                                                                                                                   |
| 11:00 hrs                                                                                                                                                       | : "Last Post"<br>Observance of 2 minutes Silence<br>Flowers of the forest – Piper                                                       |
| 11:10 hrs                                                                                                                                                       | : Prayer & Reading of the Word<br>Most Rev. Dr. James Thoppil, Bishop of Kohima                                                         |
| 11:15 hrs                                                                                                                                                       | : So hi mo zo: Cantabile choir                                                                                                          |
| 11:25 hrs                                                                                                                                                       | : Welcome Address<br>Dr. Neiphiu Rio, Hon'ble Chief Minister, Nagaland                                                                  |
| 11:35 hrs                                                                                                                                                       | : The Entertainer: Sunshine Orchestra                                                                                                   |
| 11:40 hrs                                                                                                                                                       | : Special Address: Honoured Guest                                                                                                       |
| 11:50 hrs                                                                                                                                                       | : Bridge over troubled water:<br>Vila Keditsü & Tajenyuba                                                                               |
| 11:55 hrs                                                                                                                                                       | : Greetings                                                                                                                             |
| 12:00 hrs                                                                                                                                                       | : Band Display: LFS Children Pipe Band                                                                                                  |
| 12:10 hrs                                                                                                                                                       | : Closing Remarks<br>Mr. Abu Metha, Advisor to Chief Minister, Nagaland                                                                 |
| 12:20 hrs                                                                                                                                                       | : Buglers Dismiss: Assam Rifles Pipe Band                                                                                               |
| <b>LUNCH</b><br>Band Performance: Naga Territorial Army Band<br>Flagging off of the Vintage Car Rally:<br>Dress Code: Formal / Suit / Military / National Dress |                                                                                                                                         |
| 17:00 hrs                                                                                                                                                       | : The Battle of Kohima-<br>Yesterday, Today, Tomorrow-<br>A talk at the banquet hall, Hotel Vivor<br>followed by dinner (By Invitation) |

## NSCN/GPRN-i züngsem ka mapa nungi anentsür

**Dimapur, Yimpoksüi/Nov. 09 (TYO):** Linük anema aser lokti anema mapa inyakra nung shilem agiba yong Pongching yimtsüng nungi Tongkam Phom, Sectional Officer (NSCN/GPRN) alias H. Akum Phom, s/o Hadok Phom linük tenzüka mapa nungi anentsür, ta NSCN/GPRN sangdong ka ajanga ashi.

Central Secretariat nungi pa mapa nungi anentsüba sangdong agütsüba nung Tongkam yagi taila maitüsü amshia temelaba makai civil societies aser kakat reju balala nungi senotsü meshiba putet, ta shia liasü.

Anungji kija, lokti, society, unions, business associations aser state sorkar ketdangsür temi iba nisungba den amalitep akaba alinungbo pei jurila khuret asütsü aser iba 'termination order' agütsüba anogo nungi pai inyaksangshiba kecha NSCN/GPRN khuret masütsü, ta sangdong ajangasa ashi.



November 09, 2025 nü Patna nung Union Minister & Lok Janshakti Party (Ram Vilas) lenir, Chirag Paswan aser BJP lenir Smriti Irani na den tangartem tangokba noksa nung angur. Mongolbarnü Bihar nung assembly election tanabuba shilem agitsü.

## Delhi tesem aika nung Air Quality Index 400 dak tali tuogo

**New Delhi, November 09 (Agencies):** India nung mopung temenentiba yimtitem rongnung linük yimtiba, Delhi densema lir; Honibarnü Delhi tesem aika nung mopung menenba tasadangba AQI 400 dak tali atu.

Central Pollution Control Board (CPCB)-i ashiba agi, Honibar nikongdang tashi nung Delhi nung average Air Quality Index (AQI) ji 361 liasü aser ibaji "red zone"

category nung lir.

CPCB-isa, Delhi kübok Alipur nungbo AQI 404 liasü, ITO nung 402, Nehru Nagar nung 406, Vivek Vihar nung 411, Wazirpur nung 420 aser Burari nung AQI 418 liasü, aser itemji 'severe' category nung lir. NCR Region kübok Noida nung AQI 354, Greater Noida nung 336 aser Ghaziabad nung AQI ji 339 liasü aser itemji "very poor" category nung lir.

Hokolbarnü India nung

mopung temenentiba aliba yimtiji Delhi liasü (AQI 322).

Amongnü Delhi nung mopung kanga menendaksüba shilem 15.2 bo transport sector ajanga liasü aser shilem 30 bo alu nung jana arongba agi liasü, ta Decision Support System (DSS)-i metetdaksü. Taruba anogo ishika tsüngda Delhi nung mopung quality ji "very poor" category nung alitsü, ta Air Quality Early Warning System ajanga metetdaksü.

## PM Modi-i November 11-12 anogotem nung Bhutan semdangtsü

**New Delhi, November 09 (Agencies):** Ato kilonser Narendra Modi-i November 11-12 anogotem nung Bhutan semdangtsü, ta Amongnü Ministry of External Affairs (MEA)-i sangdong ka ajanga metetdaksü.

Ato kilonser Modi-i Bhutan Chuba, Jigme Khesar Namgyel Wangchuck ajurutsü aser tenati 1,020 MW Punatsangchhu-II Hydroelectric Project semzüksütsü. Iba project ya India sorkar aser Bhutan sorkar na külem project ka lir.

Ato kilonser Modi-i Bhutan Ato kilonser, Tshering Tobgay-a ajurutsü.

Pai Thimpu nung aliba Tashichhodzong nung sarasademtsü aser Bhutan sorkari ayongzükba Global Peace Prayer Festival nung shilem agitsü, ta MEA-i metetdaksü.

Ato kilonseri Bhutan

tsüngda tesendaktep ano tajungba akümtsü atema jembiba den külemi region aser International onüktem nung tebilemba lemsateptsü.

Modi-i India-Bhutan railway project ana asadangtsü; Kokrajhar-Gelephu line ajanga Assam aser southern Bhutan sendakteper aser Banarhat-Samtse line ajanga West Bengal aser southwestern Bhutan na sendakteper. Yaküm March ita nung Modi-i Bhutan semdangba sülen linük ana tsüngda project ana atemaji tezüngzüktep agia liasü.

Bhutan atema terenlok tsütsü partner tulutibaji India lir.

Taküm Bhutan Ato kilonser Tshering Tobgay-i India anaben semdanga liasü. Taküm February ita nung semdangba mapang pa Leadership Conclave of School of Ultimate Leadership sentong nung aden aser September ita nunga pai semdangba ajanga linük ana India semdanga liasü.

## Bihar election tanabuba shilem atema nüboyim tembangogo

**New Delhi, Yimpoksüi/November 09 (Agencies):** Bihar assembly election tanabuba shilem atema nüboyim sentong Amongnü nikongdang tembangogo.

Bihar election atema ita ka jungnüa nüboyimba mapang nung NDA aser Mahagathbhandan teloktep na tsüngda kanga aitsütepa aruogo.

November 6 nü Bihar election mezüng shilem nung voters shilem 65 dak temai vote agüja liasü aser tanabuba shilem November 11 nü agiba sülen November 14 nü votes azüngtsü.

Election mezüngbuba shilem menden 121 atema agi aser tanabuba shilemji assembly menden 122 atema agitsü.

Election tanabuba shilem nung Chakai menden nung NDA teloktep nungi JD(U) minister Sumit Kumar Singh-i tokteptsü, BJP MLA Shreyasi Singh-i Jamui menden nungi, JD(U) minister Leshi Singh-i Dhamdaha menden nungi aser BJP minister Neeraj Kumar Singh-i Chhatapur menden nungi tokteptsü.

Amongnü election nüboyim tatembangbuba anogo nung Union Home Minister Amit Shah, Defence Minister Rajnath Singh aser Opposition lenir Rahul Gandhi nungeri yimti balala nung nüboyim sentong ayongzükba agiogo.

Rahul Gandhi-i Kishanganj aser Purnea district na nung nüboyim sentong agi. Item district nung Muslim nunger nütüng aika lir. Tan election nung Rahul Gandhi-i nüboyim sentong 15 nung shilem agiogo. Ita ana tejaklen Gandhi-i hopta ana tashi Voter Adhikar Yatra agia liasü.

Amit Shah-a anogo aika Bihar nung monga nüboyima aruogo. Amongnü pai BJP tashi meiti aliba tesem ana-Sasaram aser Arwal na nung nüboyimogo.

Ano Rajnath Singh-ia Aurangabad aser Kaimur district na nung nüboyima liasü.

Ato kilonser Narendra Modi-ia nüboyim sentong 14 nung shilem agiba den külemi roadshow ka nung shilem agia liasü.

Congress general secretary Priyanka Gandhi Vadra-i tang mezüng Bihar nung nüboyim sentong nung shilem agiogo. Lai election nüboyim sentong 10 nung shilem agi aser roadshow ka agia liasü.

BJP nungi party Tir JP Nadda, Union Minister- Nitin Gadkari aser Shivraj Singh Chouhan na, Uttar Pradesh Chief Minister Yogi Adityanath, Assam CM Himanta Biswa Sarma aser Madhya Pradesh CM Mohan Yadav nungeria Bihar nung party atema nüboyim sentong aika nung shilem agiogo. Iba dak alia Maharashtra Deputy CM aser Shiv Sena lenir Eknath Shinde aser TDP nungi Andhra Pradesh minister Nara Lokesh nungeria NDA atema nüboyimtsüogo.



### Central Sorkar Mapa Inyakertem Atema

## TANÜ SHISA KAA TELEMTETBA AGIBA AJANGA AKÜMLI PIYONG AJANGZÜKTSÜ

Unified Pension Scheme (UPS) shimtsüla



① Unified Pension Scheme (UPS):

Central Sorkar Mapa Inyakertem Ajak asoshi Guaranteed Pension Scheme

Arrshi küm 59 majungdang mashie mapang ka nung UPS nungi NPS-i khen melentsü akok.

Unified Pension Scheme (UPS) ajanga Assured Monthly Retirement Plan Agütsür



**Assured Payout @50%**  
Tesüiba ita 12 indang average basic pay



**Minimum Guaranteed**  
Payout of ₹10,000



**Dearness Relief**



**One Time Lumpsum Payment**



**Withdrawal**  
Corpus indang 60% tashi



**Income Tax Benefits**  
NPS nung aliba ama

Form A2 ji <https://www.npskra.ndsl.co.in/ups.php> nungi download süang aser ner DDO nem agüjang mesüra online ajanga apply süang.

Osang tejangja metettsü atema [www.pfrda.org.in](http://www.pfrda.org.in) nung reprangang mesüra UPS Help Desk dangi call süang (Toll-free): 18005712930



Ano osang tali janglatsü atema iba QR Code scan süang

@PFRDAOOfficial | @PFRDAOOfficial | @pfrdaoofficial | /company/pfrda/ | @pfrdaoofficial



## TIR YIMYIM YIMOBILEM (EDITORIAL)

DIMAPUR MONDAY, NOVEMBER (YIMPOKSÜI) 10, 2025

### Temelenshi bener arutsüba yimsüsür

**T**anü nungi Kohima nung Commonwealth Parliamentary Association India Region Zone –III purtem 22 buba lokti senden sentong tenzüksü. Iba senden omen ya “ Sentong, Terenlok aser Nübertem : Temelenshi bener arutsüba Yimsüsürtem”, ta shimteta lir. CPA India Region, Zone III nung ya North East state-tem dena lir aser Lok Sabha nung speaker, Om Birla-i anir North east state-tem nungi yimsüsürtem arua iba senden nung shilem agitsü. Atangji, “Temelenshi bener arutsüba Yimsüsürtem” omen nung yimsüsürtem adenshia jembitsüba yimsüsürtem ajak asoshi tebilemdangtsü tayongzüka tuluka lir. Arogo asünungbo, ibai toklang tenzükertem temeja asentenshi sentong ka süla. Aji oda, temelenshi bener arutsüba indang jembidang, yimsüsür shiai pei taküm aser pei mapa indang tama bilemdangtsü adoktsü. Nübertem madak yimsü asütsüba ya, democracy nungbo, akhi chuba yimli nung chubai yimsü asüba amato pei sünütsü süa nübertem timtemdaktsüba masü saka nübertem tenzüksü asoshi lir, kechiyong yimsüsür akümtsüba, akhidang amato chuba kidong mesüra yimsüsür jang aser azü nungi peisasa akümtsüba masü saka nübertem shimer. Aji oda, tanü putu nung yimsüsür akümbaji yimten tashi amer nübertem saru chia alitsü aser tangar tsükchir kin makyonga aotsüba masü saka pei lima nung pei nübertem den lia pei lima aser nübertem tenzükertem lir. Iba tangtetba nung, taoba mapang ka Nagaland nung election agitsüba mapang ka yimten telok kati ‘Temelenshi Arudagi, Change is Coming’ ta yimyim agütsüba asenok ajaki angashiogo. Iba yimyim yagi election ya nübertem asoshi temelenshi tajung bener arutsütsü pur yimsüsürtem shimtsüba sentong ka lir ta angateter. Aji oda, metsütsüi ‘Temelenshi Arudagi’ ta ayimer teloki election nung takok angu aser government aküm, anungji parnoki ayimba ama Nagaland tesem tesem nung lenmang mejungi aliba yanglushi aser küm aika merenemteti ajokshia aliba government meyong kiojen tongtibangtem renem, aser ano Nagaland nung alirtemi mangashidang aser mengudang aliba ‘Road Show’ sentong ayongzüka longsutep aser Nagaland ya alima nung Benjong lima ta sangdong aser Hornbill benjong alitsü tesem ka yateta yangji Kisama yim aküm aser temelenshi tulu nung alima tesem balala nungi raliwalirtem jaoka Hornbill benjong among. Ajisüaka, item ama temelenshi tajungtemji talangka inyaka moutet aser tetenzük dang tejangraba tulu agi inyakba temelenshi mapatem, gari lenmang süli mesüra kiojen süli raksaa ao aser meyanglushitet. Naga yimten tebilemtsüa kokteta temelenshi bener arutsütsü nangzüka, saka Naga nung tiamajung, Naga yimten nung temelenshibo aru saka temelenshiji tajung tazü masü saka Naga nung rongnung telemsa tali-tali küma aoba temelenshi dang atalok. Aji oda, tangbo Nagaland nung temelenshi bener arutsütsü purtemi bener arutsüba temelenshiitemji Naga yimten nüchiso bushir telok ana-semka aliba nungi metsü-semerka kümdaktsütetogo aser lanurtem dang mapa inyaktsü len mesayutetba agi tanur tajung aika taküm raksadagi. Item ama temelenshi tajungba-tajungba bener arutsü melen, temelenshibo temelenshi saka temelenshi tamajung bener aruba ya, tanga timtem aser kuli agi masü, temelenshi tajung bener arutsütsü yimyim ayimer yimsüsürtem jakla aser tangatetba memelenshiba ajanga lir. Aji oda, Nagaland nung temelenshi tajung bener marutetba ya sen makaba agia masü mesüra yimsüsürtem dak tazüng-temetetba maliba agia masü saka pei ajungtsü asoshi dang bilemba ajanga lir. Nagaland nung yimsüsür akümtsüba, ashiko, aika asoshi business inyaktsü atema yimten tashi bushiba mapang ka asütsüa akok. Iba jagi alima masü saka yimsüsür kibong nungang temelenshi reprangtetsüa akok. Tang Kohima nung CPA India Region III nung jembitsüba “ temelenshi bener arutsüba yimsüsürtem” jagibo pei nübertem Relief jang chiyonga aliba pei lu nung ruzükba chiyongdaktsütsü, taneptsü bushia bendangleni oa aliba asen lima nung taneptsü angutsü, kaketshisatsü bushii bendangleni aotsü melen bendangertemang asen limai arutsü, lanurtem mapa bushia bendangleni oa aliba anentsü, kechiyong asen lima nung mapa inyaker meinyakma adoktsü, light tashi peria angutsü aser lenmang tajung nung jajatsü aser asen lima yimtem sangwaba agi anü kodang adoker aluar memetetsüsa temelenshi bener arutsütsü imlar.

## OLEMSABANG

### ABAM PRESIDENT KISÜNG MASÜ LOCAL AROGO GROUND LEVEL TASHINUNG MELENSHITSÜLA.

~ K. LIMA LONGKÜMER

(Yashi adok nungi...)

**Ao lima nung Arogo tenzüka ya Theology zünger Toklang teuzükkeri Arogo mesemba konga maka.**

1. Molungkimong yimtsüng nung 22 December 1872 anügo mezüing Ao lim nung khristar Arogo tenzükbaji Theology azünger-i mesemba masü.
2. Molungyimsen yimtsüng nung tanabuba Arogo tenzüka 1876 Theology azünger-i mesemba masü. (Yimtsüng ana nungji Pastor Theology mazünger temi ang tama inyaka tenzüka).
3. Rev. Dr. E. W. Clark ya Theology zünger asen limai aruba masü.
4. Godhula yaa Theology/Bible zünger asen limai atua Arogo tenzüksü masü.
5. Temeshi lai Ao nung meyipzüka ya Theology mazünger timbai meyipzüka. Translator Chairman bajia Theology mazünger-ser inyakba lir.
6. Tamanger tejangrar lungjemmer Arogo tenzüka. Tanem-tanemi Theology azünger tajung bushia tah agüja tenzudaktsü.

Tanü aliba Arogo yagi akedang Arogo inyaksim ajak melenner. Khristar Arogo memesük, aser member tem-a azümesena akümer. Tanü Arogotemi ozüing ajak raksar, anungji Tsüngrem tanela maliba Arogo kümdake.

**Arogo ajak Temzüng/ Guide line lir, iba nungji ya bendenloksema inyakang.**

1. Nenok Theology azüngeritemi merumerua aser ambayima inyakba kuli kar agütsügo aji tim inyaka ta pilemra ABAM President-ji nenok Theology azüngeritemisa maneni inyakang. Ahyanger/servant kati kibur amadoker.
2. Arogo nung Sali moko acher aser yi achemmerbo Deacon meinyakdaktsütsüla.
3. Sati kuli mekai Deacon inyakker-i sati kuli record Register nung mekongshidaktsütsüla.
4. Arogo nung Baptiba member Arogo ka nungi kati transfer aodang certificate nung takdang (Mark) palala mesüra A, B & C tamaitü agütsütsüla.

A = Arogo nung sati kulizüing akiba.  
B = Arogo nung sati maka kibong akümba.  
C = tenüing agi member akümba. Itemji Tekülem sentep-i maoba aeka lir. Aser itemji Election nung temai adokka yim nem pesaprong agütsür.

5. Tenla kidang cultural program makitsüla. Pastor shibai meladir pa/la Pastor nungi anentsütsüla.
6. Pastor-temi Aor kasa kin kijimtsüba lir. Pastor-baji Arogo nungi idangjisa atsüngtsütsüla.
7. Deacon-tem arshi küm 60 nungiang inyakdaktsütsüla. Mokochung, Kohima, Dimapur aser Chümoukedima dak alakka Town palala nung Arogo tela, zungsem ishika alidakbo arshiküm 60 majungyonga pa/la satikuli akaba nübu tajung süra aji tashishitsü mali.

Tanü asüingbo Aor arshi küm 70-85 tashi tainpur health tajung tashetait aser Arogo tongbu abutsüsa tajung alka lir ajisaka Pastor aser Board of Deacon-i itemji mela-mela reject sütsür ibajagi nisung nübu agi anünga akümdang arshi küm 35 nungibo Deacon nung shimmer, item lanur nübujagi tetemsü nübutem du Arogo nung tenzüksü metemsü ama asoa/anoa yutsür. Tain tajung meshim yutsübayong nübu agi anünga akümer.

Akedang nungi Aor konangnungsang aser tsükchitep nung lia Khristar Arogo anarongdenna akizük, iba tiyalong mapangjia mangatettep nung Khristar Arogo akizük. Liyonga arudang ABAM-i anir mangatetteptsüa onük pennok, lia arudang Arogo anana aküm, Theology zünger toklang tenzükkertemi ake Arogo inyaksim indokker, ambangim shesatsü alibayong lia-lia Arogo senbong nung teka aitsü tarentak mali, temenen nungi tsükker ta tsüemma mali.

Tanü toklang tenzükker ajunga kija shia reprangdangbo ajak tajung teshimtoktsü mali, ajisaka parnok lungjemba nungbo tenük amua akümer, anungji thangarbo parnok mangur. Ni ya nenok tsükchir macü ajisaka khristar Arogo laoa aliba mesotsü atema orah-matsü shesatsü tenner nüngsen akia zülur. Ochi atema ni shinga metsübur.

Arogo ya shirnok meyong? Aser raksa aliba ya shirnoki yanglutsü???

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# 'Bless Israel' sentong nung Evangelical Khristan 1,000 aden



November 05, 2025 nü Queens, New York nung aliba Breath of Life Arogo indang auditorium nung "New York Blesses Israel" sentong nung adenertemi Yihuda nung pusema Israel wako ayipshishidang tangokba noksa nung angur.

**November 07, 2025:** November 05, 2025 nü Queens, New York nung aliba Breath of Life Church nung Khristan 1,000 dak tali adenshia "New York Bless Israel" sentong nung aden.

Kasa sentong nungjisa Breath of Life ministries küm 25 ajungba-a repsema agi.

Tang Israel aser Middle East nung tensa mejungi aliba mapang nung Yihuda nung pusemtsü nükjidong nung iba sentong ya ayongzüka agi.

Osangbener den jembidang Breath of Life Arogo nung pastor, Victor Tiburcio-i, "Tensa mejungi aliba mapang nung Yihuda nung pusemtsü nükjidong nung iba sentong ya ayongzüka," ta metetdaksü.

Osangbenertemi osang tai prokba atema aija pastor-i, Yihuda nungertem ya takoksa angurtem lir, ajisüaka osangbenertemi Yihuda nungertem ya nisung tamajungertem ama sayutsü meranger, ta ashi.

Iba sentong nung jembidang Tiburcio-i, "Yirusalem nung yimjung atema sarasademjang, ta Laishiba nung shia lir. Ibayongji tanü asenok yangi

adenshia lir. Israel atema Tsüngrem sentong lir aser maneni Arogo atema sentong lir, ta asenoki amanger," ta ashi.

Kasa sentong nung New Latin America nung Director aser Colombia nung aliba Word of Life Arogo nung pastor, Eduardo Gómez-i, "Alimai New York dak ranglokba mapang ka nung iba sentong ayongzüka agiogo. Iba ama sentong ka ayongzüka agiba ya Israel aser Yihuda nungertem nem mopung tanep agütsüba aser parnok atema tajunghiba lir," ta ashi.

Gomez-i lokti dang, "Asenoki wako mesodi" ta metetdaksü.

Ajioda sentong nung adenertemi Israel nung wako ayipshishia, "Onoki Israel meimer! Onoki Israel atema sarasademtsür! Onoki Israel aser Yihuda nung pusemer," ta ayimden.

Gomez-i, "Asenok Evangelical Khristantemi ibaji melunger. Israel nungertem atema tembar tajungtibaji asenok lir," ta metetdaksü.

Iba sentong nungji Maccabi World Union nung Deputy CEO aser Israel Diaspora Ministry nung inyaker Rabbi Carlos A. Tapiero-a densema liasü.

Sentong nungji Breath of Life Church-i Rabbi Tapiero nem tetushi agüja liasü. Evangelical Khristantem aser Israel tsüngda telongjem tashi itshtsü atema pai mapa tajung inyakba asoshi pa nem tetushi agütsü.

Rabbi Tapiero-i, "Yihuda nungertem pusemba atema ni nenok dang pelar. Kanga pelar, kanga pelar, kanga pelar. Ni ibaji 1,000 ben shiaka iba jagi meperitsü. Nenoki Yihuda nungertem meimba atema pelar," ta metetdaksü.

Kasa sentong nung Breath of Life ministries küm 25 ajungba-a repsema among. Iba dak sendakba nung Rabbi Tapiero-i Maccabi World Union tenüng nung Pastors Victor aser Hattie Tiburcio na nem tetushi agütsü.

Osangbener den jembidang Pastor Tiburcio-i, "Arogo aser Breath of Life ministries küm 25 ajungbamong onoki amonger. Onokisa INLIMI Institute of Leadership & Ministry küm 20 ajungba amonger aser UNILIMI University of Leadership & Ministry küm 10 ajungba amonger," ta metetdakja liasü.

## ANOGO ABEN TSÜNGREM DEN

### Tanela süngjangji tamang katetba (Gal. 5:22)

Ibai kümzükbata tamang masü, mesüra anogo shia Tsüngrem dak amangba masü (ibajia dena liaka). Ibai asenoki Tsüngrem aser tangar den koda temulung lemtetta alir ibaji lir. Kari iba tetezü ya "pei sasa den, yimya den, aser pei tenangzükbata ochi shia aliba" ta ratettsür.

Kodang asenoki nisungba o jagi pa alena lir ta agizükdir pa den tenangzüktepba züluteptsü menügdaker. Kodang pai langka inyaksü nangzükdir, pai aji inyaksü ta temulung doka alitsüla.

Tamang katetba nisungi pai nangzükbata mapangji shidak ayur, pai agütsütsü tim mapang shidak nung agütsür, meeting ajak nung mapang shidak nung adener, pa nem inyaksü mapa nungloksüba ajak mapang shidak nung inyaksür. Tenangzükbata nung seplasepshi masür. Tenla- senchi shidak agütsür aser ketangsüba kümdanga asür. Pa sempet (talent) timi ketang asür.

Tamang katetba tetezü pei o shidak ayuba. Pei ajung asaa pei o nung sepla-sepshi masür. Tamang katetba nisungi "pei akoksatsüsa azüngashir, aser memelenshir" (T.Ken 15:c). O ka nung pai atemzükbata memelenshir. Tenangzükbata tuluba pa nem agüjaaka kechi nangzüka aka aji memelenshir.

Tamang katetba tatembangji pai Yisu dang nangzüka aliba melenshi dang nungi ibaji atema asütsü mulunga alir. Kodang Chubai Yisu dang nangzükbata toktsütsü ashi, nisung jagi langzü, "Temulungjangi ibaji bilemer, tebangi ibaji jembir; tekai aji inyaker; aser nüngdakra, Tsüngrem taochi ajanga aji azü agi ajenbangtsü." Kodang Polycarp dang taküm linüra Yisu tenangzüka ta ashi, pai mi nung arungtsüang shimtet aser ashi, "Item küm tirtok ni kü Kibur tenzüka. Pai kodanga kü dang tamajung kecha meinyak, aser ni tang kü Kibur aser tesayur tang ashioktsütsü makok."

Tamang asoshi tepsetertem tamang katetta liasü, aser taküm korang angutsü (J. Adok 2:10).

## "Myanmar nung asen kin" kaketsaya



Longchara Baptist Arogo nung Mission Sunday amongba anogo sentong nung Myanmar nung Leinong Naga kin indang züluba kaketsaya agi "Myanmar nung Asen Kin" sayaba sentong nung LBA sannüker den Deacon aser Mission Board züngsemtem külemi agiba noksa ka yangi angur. (November 09, 2025).

**CTN, Yimpoksüi/November 09 (TYO):** Amongnü November 09, 2025 anogo nung Longchara Baptist Arogo, Changtongya Town nung sannüker Moameren Jamir-i 'Myanmar nung Asen Kin' ta ajaba kaketsaya sayatsüogo.

Iba kaketsaya ya LBA Mission Sunday sentong nung agia liasü.

Iba kaketsaya Myanmar Naga lima nung Leinong Naga kin dangi osang tajung bener oa inyakba mapang ajangshiba aser angazükba otsütem Missionary I. Imlisowa Longkumer-i züluba kaketsaya lir. Iba kaketsaya Longchara Baptist Arogoi inyakba Kibubaer lu Myanmar mission asoshi amshitsü atema Friends for Mynmar Mission (FMM) teloki yaritepa adoktsüba kaketsaya lir.

Iba kaketsaya Myanmar nung Leinong kin lipok aser

sobaliba indang shia angutsü. "Par otsüi ashiba agi, Leinong kin ya tanü Nagaland nung aliba Ao kin den külemi aru, saka ayong ka nung apu majangteti ayongküm nungi Aoah, Aoah, tetezü par oshi nung Oang, Oang ta shia pilaba adianu kin ana lir," ta iba kaketsaya nung tezüluri shisema lir.

"Leinong purtem asoshi tetsür tebur kecha tebandang makai, parnok ajaki mapa meranga inyaker. Tanur asodanga tebuji kidang ali nung dang nuji melamelaa sotetter ta parnok amanger aser arem nungi shiruru kaseter adokdanga lenmang nung shiba tama ajurudir, pa nemji ajurushi agütsür," ta iba kaketsaya nung shisema lir.

Iba kaketsaya jenjang ya sen 200 dang lir aser taginertemi phone number 87875 84752 (Dimapur) aser 98622 47464 (pastor, LBA) ajanga tongteprateptsü akoktsü.



Dimapur Ao Baptist Arogo kübok Merali Fellowship nung November 09, 2025 Amongnü temoatsü sentep sentong nung DABA Ola teloki ken atenba noksa nung angur. Item kentenertem ya lanurtem rongnung teintet rogotem lir.



# Fung-wong yipru atema Philippines renemer

**Manila, Yimpoksüi/ November 9 (Agencies):** Aogo ishika tejakdang yipru tesashi ka agi nisung 200 dak tema tepsetba sülen Philippines ano yipru tesashi ka atem renemshiba mapang nisung million ka shi pei talidak nungi aninogo.

Fung-wong ta nüngja agütsür yipru ka agi imla aliba dang nungi takaraba Deobarnü northeastern Philippines kongshia power maka kümdaktsüogo aser iba ajanga weather bureau-i tekümdangtsü metetdaktsütsüsa aküm.

Philippine Atmospheric, Geophysical and Astronomical Services Administration (PAGASA)-i ashiba agi, Fung-wong koba dang local temi Uwan yipru ta ajar, iba yipru yagi Deobar aonung tashi nung Aurora province kongshitsü. Yipru yagi mopung 185 kilometres per hour (115 miles per hour) aser gusts 230km/h (143mph) tashi bener arutsütsü.

PAGASA-i, linük southeast aser teyong nung aliba tesemtem atema alert level tematiba; Signal No 5 agütsüogo, kong Catanduanes, Camarines Sur, aser Aurora province densema lir aser Metro Manila aser temeket nung aliba tesemtem atema Signal No 3 agütsüogo.

Typhoon Kalmaegi agi linük kanga mejungi kongshia nisung 224 sür aliba mapang ano Fung-wong yipru ya Pacific tzüyim nungi arudar.

Philippine Tir Ferdinand Marcos Jr-i, Kalmaegi yipru agi teraksatsüba tulu bener arutsüba aser Fung-wong yipru agi kanga mejungi kongshitsü imlaba mapang state of emergency ka sangdongogo.

Philippines nung mopung 185km/h (115mph) mesüra iba dang takaraba aonba tropical cyclone tem ya super typhoon ama züngshir.

Bicol densema northeastern province tem nung yipru agi kanga mejungi kongshitsü aliba yimtsüngtem nungi nisung 916,860 dak tema aninogo.

Defence Secretary Gilbert Teodoro Jr, shibai linük disaster response agencies aser military achaayanger pai Honibarnü TV nung sangdong ka ajanga, Fung-wong yipru yagi teraksatsüba tulu bener arutsütsü akok ta shia nüburtem dang kümdang alitsü metetdaktsüogo.

Fung-wong yipru agi nisung million 30 tema dak kongshitsü akok, ta Civil Defense Office-i metetdaktsü.

Philippines ya kümshia yipru 20 shi-i kongshir. Iba den linük ya menoknok agia mapangshia kongshir aser active volcanoes-a aika lir. Philippines ya yipru mopung aser menoknok amala lendong agi tamajungtiba kongshiba linük rongnung ka lir.

# G20 South Africa nung US shilem magitsü: Trump



**Washington, Yimpoksüi/ Nov. 09 (Agencies):** Kuli tejangja mesayutetaka South Africa nung temesüng nisungtem reshikangshia amshir ta jembiba mechi iba linük nung G20 senden amenba nung US madentsü, ta Tir Donald Trump-i ash.

South Africa nung iba senden ayongzükba ya maksü lir, ta US tiri ash, kong alima nung economies tulutiba linüktem nungi lenirtem ita tatemlen Johannesburg nung adenshitsü lir.

White House-i iba telemtetba agiba ya tesasatsüka lir, ta South Africa indang foreign ministry ajanga ash aser odongtar Chrispin Phiri-i iba senden nung takok angutsü ya züngsem linük ka dak dang keta ali masü ta ash.

South Africa indang political party katia South Africa nung 'genocide' aliba mashir.

Yangji Afrikaners aser temesüng nisungtem tenüng nung aliba party tem dena lir.

Tesüiba mapang South Africa indang temulung shirangtsü puti otsü amshia Trump-i teblemba nung timtem adokdaktsür, ta Phiri-i ash.

"South Africa nung temesüng nisungtem reshikangshia amshiba kuli mali. South Africa nung iba tebilemtsü lir aser onoki itemji bentettsü meranger. Mapa tamajung agi tereprangtsü sentsü aser kin merepranger," ta pai ash.

"United States meliaka asenok tejakleni aotsü," ta Phiri-i ash.

Trump-i pa indang social media sapang Truth Social nung, "South Africa nung G20 alitsü ya maksü ulura lir," ta zülua liasü.

"Afrikaners (Dutch settlers nungi jakzüker aser French aser German immigrants) tem tepseter, aser parnok indang ali aser alu tem ozüng alema soita ayur," ta pai zülü.

"Item tashiyim ali tashi US sorkar ketdangsür kata madentsü."

Temesüng nisungtem tepseter ta jembiba ya khenyongi tai aser kuli tejangja kecha agia mesayuteter, ta South Africa sorkari ashir.

February ita South African court kati iba o ya bilemba dang lir ta shia liasü.

G20 nung South Africa madentsüla, ta taoba mapang Trump-i shia liasü aser pa melen tatong tir JD Vance

yoktsü ta ash.

Saka tangbo US ketdangsür kata maotsü ta White House-i ashir.

Küm shia züngsem linük ka-kai G20 senden ayongzüker aser senden asoshi olong renemer - aser South Africa sülen US-i ayongzüktsü lir.

"Afrikaners ya temesüng telok kisüng lir ta tuteta jembiba ya 'ahistorical' lir ta South Africa sorkari sangdonger," ta South Africa foreign ministry sangdong ka nung ash.

"Maneni item nisungtem reshikangshia amshir ta jembiba ya kuli tejangja agi temeden magütsür."

January ita US tir akumba sülen Trump-i aiben South Africa nung nütsüng tilaba temesüng nisungtem bendanga amshir ta shijen shia arur aser May ita nunga Oval Office nung pai South Africa Tir Cyril Ramaphosa dang ash.

Trump administration-i Afrikaners nem refugee jenjang agütsü. Taoba hopta White House ajanga sentong ka sangdongba nunga refugee agizükba ajemtsü aser white South Africans nem temulung agütsütsü shia liasü.

Asia nung rongsenketzüng tsütsü mepetmesü adokba sülen G20 ya 1999 nung tenteta liasü. Alima rongsen shilem 85 dak tema G20 züngsem linük ket nung lir aser rongsenketzüng tashi itdaktsütsü nükjidong liasü.

2008 küm alima nung rongsenketzüng mepetmesü ajuruba mechi iba küm lenirtem senden mezüng mena liasü.

Tangbo lenirtem küm shia ajuruteper aser alima rongsenketzüng indang jembir, kong European Union aser African Union nungia teshimtet nübu jaoker.

# Malaysia-Thailand arrtsü nung rong ka meküpok

**Kuala Lumpur, Yimpoksüi/ November 9 (Agencies):** Thailand-Malaysia arrtsü nung rong ka meküpokba sülen nisung 10 kümzükogo, tasü mang ka ngutetogo aser Deobarnü tashi nung nisung noklang aika samar bushidar, ta Malaysian maritime ketdangsürtemi ash.

Rong meküpoker anogo asemshi aoba mapang tzüyim nung maneni tasü mang timba ngutettsü akok. Iba rong ya nisung 300 shi mener Buthidaung, Myanmar nungi apuso, ta North Malaysia state Kedah aser Perlis na indang maritime authority director First Admiral Romli Mustafa-i ash.

Langkawi tzüyim nung taküm ngutetertem rongnung Myanmar nunger tebur asem, Rohingya nunger tebur ka aser Bangladesh nunger tebur ka densema liasü aser ano Rohingya nunger tetsür ka tasü mang dena ngutetogo, ta Kedah police chief Adzli Abu Shah-i ashiba state media Bernama-i sangdong ka ajanga metetdaktsü.

Muslim yimsü dak amangba Rohingya nungertem shirnok Buddhist timba aliba Myanmar linük nung nütsüngyongsük agi kanga ajema ali, iba telok nungi züngsemtem aiben Myanmar toktsür jena aotsü merangar.

Myanmar nung Rohingya nungertem ya South Asia nungi aruba bendanger ama züngshir aser parnok nem lispour jenjang magütsür aser aiben reshikangshia amshir.

Malaysia-i aoba nüburtem ya mezüngbo rong tulu ka nung mener ao, saka arrtsü tonga aoba mapang parnok ya rong tilala asem nung nisung noklang kaka mendaktsür yoka liasü.

Ketdangsürtem nem meputetdaktsütsü atema iba jenjang ya agia liasü, ta Adzli-i ash.

Rong asem yokba nung rong ana koba tia nung ali mejangja aser tzüyim nung samar alirtem maneni bushidar, ta paisa shisem.

# Pakistan aser Afghanistan tetsüngtai aitsü mulunga lir: Iran

**Tehran, Yimpoksüi/Nov. 09 (Agencies):** Tang Pakistan aser Afghanistan mangatettep adoka aliba mapang Iran indang Foreign Minister Abbas Araghchi-i Kabul den mangatettep adoka aliba angatetteptsü asoshi Islamabad yaritsü Tehran mulunga lir ta ash.

Islamic Republic News Agency (IRNA) ajanga ashiba agi, Araghchi-i Honibar aonung Pakistan indang Foreign Minister Mohammad Ishaq Dar den phone ajanga sensaksemba mapang iba maongka ya agütsü.

Sensaksemba mapang Araghchi-i Iran aser Pakistan tsüngta tesendaktep tera kanga junga yanga aliba aser akhi alemli mapang nungi yaritepa aruba ash aser kidanger Muslim linük ana ya tangatetba aser tejangraba kasa lir ta shia liasü.

Yimtenren, rongsenketzüng aser security tsütsü linük ana tesendaktep akangshitsü Iran temulungtetba lir ta pai ash.

Iran foreign minister-isa Islamabad aser Kabul tsüngta tesendaktep tamajungba akumba süoki ia bilemer ta ash aser mangatettep nung apu alatsü region nung tashi tulu linüktem teka amteper inyaktsü ajungshia liasü.

Yimjung aser tangatettep ya Afghanistan aser Pakistan atema kisüng masü saka region ajunga atema tongtipang lir ta ash.

Pakistan indang Foreign Minister Mohammad Ishaq Dar-i Araghchi dang Islamabad-i tang tesüsa Afghanistan den tesensaktep junga alitsü merangba, arütsülen tensa tajungba kümdaktsütsü nükjidong nung jembishinü akaba indang angatetdakja liasü.

Region nung yimjung aser tashi ita alitsü Pakistan teinyaktsü mezüngbubaji lir, aser ozü sorkari Kabul den tajunglen nungi jembishinü akatsü maneni meranger, ta Dar-i ashir.

Minister anaprongi linük ana tsüngta mapang shia shisa lemsatepba ajanga region nung security ajungtsü aser tarutsü nung tensa tamajungba mekümdaktsüi nokdanga ayuba nung yaritsü ta jembitepa liasü.

October 2025 nung Pakistan-i Tehreek-e-Taliban Pakistan (TTP) lenir dak tenük yoker Kabul nung tayimtsü amshia amakba sülen Pakistan aser Afghanistan tsüngta tesendaktep tali tamajungba akum. Iba sülen arütsü alema linük kati ka dak amakba mapang sepai aser civilian tem asü.

Linük ana sadangtsüba Duran Line mechi mapang talangka nungi mangatettep nung lir aser tang tashi iba mechi temulung melemteper aser tesendaktep nung tetsükdaktsü ajurur. Qatar aser Turkey nati tetsüngtai ia jembia mapang tatsüka ceasefire liasü saka tawa Istanbul nung jembishinü akaba nung tajangzük meliasü.

Pakistan litsü telung nung amakba TTP nem Taliban-i aniba sorkari tejenokdak agütsür ta Pakistan-i tai tongloaktsür, koba Afghanistan-i khenyongi magizüker.

## 35+ MFL season 6 aser 35+ MFL Super Cub 2025 tembangogo

### 35+ MFL under 14 vision League yakta tenzüktsü

**Mokokchung, 09 November (TYO):** 35+ Mokokchung Football League Season - 6 aser 1st 35+ MFL Super Cup 2025 asayamung tembangba den repsema 35+ MFL Under 14 Vision League logo aser trophy lapokba sentong ka 9th Nov, 2025 nü Aongza Ki, Mokokchung nung meraketa agiogo.

Taküm 35+ MFL Season 6 champion Revenant FC liasü aser atongba (runner-up)-ji New Ecclesia pur liasü, aser 1st 35+ MFL Super Cup 2025 Wasang FC pur champion, tanabuba nung Revenant FC aser tasembuba jenjang nung Nova SC pur liasü.

35+ MFL season 6 nung nija senpet agizükertemji: best midfielder - Tongpangkokba (Revenant FC), best defender - Tiayanger (Revenant FC), best goalkeeper - Talilepba Jamir (Revenant FC), player of the league - Moatemsü (New Ecclesia), highest scorer - Arennüngsang (30 goals from Revenant FC) aser Fair play Award - Nova Sporting Club-i agizük. 1st 35+ MFL Super Cup 2025 nung nija senpet agizükertemji - best goalkeeper - Imosanen (Wasang FC), best defender - Sentiyanger (Revenant FC), best player - Imtiyanger (Wasang FC) aser best midfielder - Tongpangkokba (Revenant

FC) liasü.

Iba sentong nung tetushi tesemdanger Mokokchung Asst. Commissioner, Ajay Moktan IAS-i 35+ MFL under 14 vision league trophy aser logo sayatsü. Iba league ya November tatemlen mesüra sangküm 2026 küm tetenzüklen nungi asaya tenzüktsü, ta tayongertemi metetdaksüogo. Iba mangdang asangsang kümdaktsüba ya talisa Nagaland Minerals & Mines Kibur, Temjenmoa Jamir-i anir LONGTEROK Sports Management-i teyari agütsüba ajanga lir, anungji, iba asoshi pa dang kanga pelar ta tayongeri metetdaksü.

Iba Vision League ya Mokokchung District Football Association aküm nung ayongtsüba lir. Iba league nung Club 6-i shilem agitsü aser itemji - Rising Phoenix FC, Speedy Cheetahs, Mini Marvels, Tenacious Titans, Daring Dolphins aser Agile Avengers nungertem lir. BARAK FC den külem sür 35+ MFL-i taküm meyi mapang to hopta ka tanurtem atema football coaching clinic ka ayonga katsüogo. Iba coaching nung tanur parnok 120-i shilem agia liasü. Iba sentong nung Barak FC nungi Head Coach, Brando arua tesayuba balala agüja liasü. Iba vision league nung asayatsüpurji tongtibangsa iba

coaching clinic nung adener nungi agitsü.

Nova SC nungi asayar Mokokchung Senior SP, Vesupra Kezo NPS-i iba league nung asayadang ajangshiba o tatsüka jembidang, medemer yimtepba den taküm aser achiajemba nung tazüokba, tetoktepba nela den temang anema lidaktsüba ya jangratemtsüka lir aser atangji football yagi nisung ka taküm melenshidaktsüba ajangshia aruogo, ta metetdaksü. Tang koba 35+ MFL-i lanurtem atema 1st under 14 vision league tenzüktsüba lir, ya mapa tajung ka, atangji Mokokchung ya footballer adokdak tesem ka südaktsütsü asoshi asenok ajaki merangdi, ta pai ayongzük.

Iba sentong tesayur Dr. Imlinichet aser osangzüür Imnatola nadi len ani. 35+ MFL tang tashi jajayonga aruba otsü tatsüka management team nungi Tiakumzuki jembi. 35+ MFL convenor, Aongsen Aier-i tarur ajak pela agizük. Akangtemsi Yaden, Youth Director, MTBA-i temoatsü meshia sarasademer sentong tenzük. Akümsen Lemtur aser Temjen Lemtur nadi ken aser guitar solo tema tesentepertem ajungmesoa liasü. Organizing Committee, Chuba Phom-i melepzüng o shia item asayamung takok angutsüsa yariteper ajak dang pelaba lemsatsep.

## Sanjay-i anir India team Sultan Azlan Shah Cup asayatsü

**Yimpoksüi/November 9, 2025 (Agencies):** 31buba Sultan Azlan Shah Cup atema India tebur team captain asütsü defender Sanjay shimogo. Ipoh, Malaysia nung November 23 nungi 30 tashi asayatsü aliba iba asayamung atema asayar tejentem aika nem anisüngzük agütsüogo.

First-choice goalkeepers, Krishan Bahadur Pathak aser Suraj Karkera naprongla nem anisüngzük agütsüogo. Pawan aser Mohith Honnenahalli Shashikumar na tena melena shimogo.

Regular captain Harmanpreet Singh, midfielder tejen Manpreet Singh aser striker Mandeep Singh nunger iba asayamung nung masayatsü.

Defender tem rongnung Sanjay, Jugraj Singh, and Amit Rohidas, along with Poovanna Chandura Bobby, Nilam Sanjeep Xess, aser Yashdeep Siwach nunger densema lir.

Midfield nung Rajinder Singh, Raj Kumar Pal, Nilakanta Sharma, Rabichandra Singh Moirangthem, Vivek Sagar Prasad, aser Mohammed

Raheel Mouseen nunger asayaba angutsü.

Maneni attack nung asayatsü atema Sukhjeet Singh, Shilanand Lakra, Selvam Karthi, Aditya Arjun Lalage, Dilpreet Singh, aser Abhishek nunger shimogo.

Asayamung atema standby asayartemji Varun Kumar, Vishnu Kant Singh, Hardik Singh, aser Angad Bir Singh nunger asütsü.

Asayamung dak sendakba nung Chief coach Craig Fulton-i ashiba agi, "Sultan Azlan Shah Cup ya international hockey calendar nung asayamung tongtibang ka lir, aser iba asayamung nung team tajung ka anir asayatsü yongya atar. Attack aser defence naprongla nung structure asüngtetsütsü, pressure nung asayaba mapang telemtetba tajung agitsü aser asaya tepeyong seplasepshi mesüi asayatsü atema rangloker inyakdar. Training mapang iba telok yagi discipline tajung aliba aser tetzüraba aliba sayuogo aser iba asayamung atema parnok renema lir ta amanger."

Iba asayamung nung India

team mezüngbuba Korea den November 23 nü asayatsü aser iba sülen Belgium (November 24), hosts Malaysia (November 26), New Zealand (November 27), aser Canada (November 29) nunger den asayatsü.

Asayamung ya round-robin format nung asayatsü aser temaba jenjang nung tembangba team ana November 30 nü final asayatsü.

India-i Sultan Azlan Shah Cup ya tatemsa 2010 küm akok aser 2019 küm tanabuba jenjang nung tembanga liasü. Sultan Azlan Shah Cup 2025 atema India Hockey team:

Goalkeepers: Pawan, Mohith Honnenahalli Shashikumar.

Defenders: Chandura Bobby, Nilam Sanjeep Xess, Yashdeep Siwach, Sanjay, Jugraj Singh, Amit Rohidas.

Midfielders: Rajinder Singh, Raj Kumar Pal, Nilakanta Sharma, Moirangthem Singh, Vivek Sagar Prasad, Mohammed Raheel Mouseen.

Forwards: Sukhjeet Singh, Shilanand Lakra, Selvam Karthi, Aditya Arjun Lalage, Dilpreet Singh, Abhishek.

## Novak Djokovic ATP Finals nung masayatsü

**Yimpoksüi/November 9, 2025 (Agencies):** Novak Djokovic-i pa indang career nung title 101buba abenba sülen mapang tatsüka lir pa tapu yiruba ajanga ATP Finals nung shilem magitettsü ta sangdongogo.

Arishi küm 38 tain asayar ya Jimmy Connors Group nung Lorenzo Musetti-i melentsü, shiba Djokovic-i Honibarnü Athens nung ATP asayamung ka final nung koka liasü.

"Ni Turin nung toktepba takokba tashi meranga tajungtiba asayatsü yongya ata liasü, saka tanü Athens nung final asayaba sülen ni yiruba ajanga iba asayamung nung masayatetsüsa kümogo," ta Djokovic-i social media ajanga metetdaksü.

"Ni asayaba reprangtsü imla aliba fan tem dang tatok meshir. Asayartem ajak iba asayamung jangradema asayatsü imlaja atar aser nenok den tanaben asayatsü yongya atar," ta pai ashi.

Djokovic-i otsüsütsüsa ATP Finals tenetben koka lir aser pa taküm mezüngbuba asaya Carlos Alcaraz den asayatsü liasü.

Iba asayamung atema Djokovic yakta qualify süatoker liasü, saka iba hopta tetenzüklenang pa iba

asayamung nung asayatsü jangja liasü.

Mongolbarnü Italy indang tennis federation tekolakba Angelo Binaghi-i ashiba agi, Finals nung shilem agitsü atema Djokovic-i jangjatsüogo.

Djokovic iba asayamung nung masayatetsüsa akümba ya Musetti atema tajangzük kümogo, shiba ATP Finals nung asayatsü atema Athens nung Serbia nunger asayar ya akoktsü nüngdaka liasü.

Tang mezüngbuba ATP Finals nung Italy nunger ana asayaba angutsü. Italy nunger rongnung ano defending champion Jannik Sinner, Bjorn Borg Group nung Auger-Aliassime, Ben Shelton, aser Alexander Zverev nunger den asayatsü.

Musetti iba asayamung nung mezüngbuba asaya Taylor Fritz den asayatsü. Honibarnü Djokovic-i Athens nung 4-6, 6-3, 7-5 agi Musetti madak takok ngua pa indang career nung title 101buba benogo.

Arishi küm 38 tain Djokovic-isa, hard courts nung title 72buba koka Roger Federer ajateter otsü tasen ka yangluogo.

Maneni Roger Federer aser Jimmy Connors na sülen Djokovic-i dang asayamung 100 dak tema kokogo.

## Akash Kumar-i ball 11 nung half century yanglua otsü tasen yanglu

**Yimpoksüi/November 9, 2025 (Agencies):** Ranji Trophy Plate Group nung Deobarnü Arunachal Pradesh den asayaba mapang Meghalaya nungi asayar Akash Kumar Choudhary-i ball 11 nung half century yanglua pa ya First-Class cricket asaya puti otsü nung half century takaratiba yangluba asayar kümogo.

Arishi küm 25 tain right-handed batter yagi England nunger asayar Wayne White-i ball 12 nü half century yanglua record yanglur aliba ajatetogo. Wayne-i 2012 küm Leicestershire nungi Essex den asayaba mapang iba otsü tasen yanglur liasü.

Akash na No 8buba nung batting ameni aiba mapang Meghalaya team-i asayar 6 out sür run 576 yanglur liasü, aser pai mapang mintoki otsü tasen yanglu. Pai Limar Dabi-i ball aonba mapang over ka nung six trok azükba densema six ti atonga zükogo, koba T20 asaya nunga aibenbo mangur. Meghalaya-i asayar 6 out sür run 628 yangluba sülen declare

asüba mapang Akash-i out mesüi ball 14 nung run 50 yanglur liasü.

Iba ya Ranji Trophy puti otsü nung half century takaratiba yangluba dang masü saka alima ajunga nung First-Class cricket asaya nung half century takaratiba yangluba lir. India nunger rongnung Bandeep Singh-i Jammu & Kashmir tenüng nungi asayaba mapang ball 15 nung half century yanglua record bener liasü.

Akash ya mezüng 2019 küm December ita Nagaland den First-Class cricket asaya liasü. Pa kasa küm Meghalaya tenüng nungi Sikkim aser Gujarat na den List-A aser T20 asayatem asaya. Domestic cricket asaya nung iba asaya masü tsüngda pai taoba innings ter nung half century ana dang yanglur liasü. Pai asaya pongu atonga run 20 dak tema meyangluteti liasü.

Ajisüaka pai tawa kanga junga asayadar aser Meghalaya team Bihar den tesüsabuba asayaba mapanga pai half century ka yanglua liasü.

## BILEMDANGANG

"Azümesener asoshi mapa ajak tasak lir."